



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimyim@gmail.com

TAPAK 8

Yangia anidakangma :



Tir Yimyim



tir\_yimyim



tir yimyim

TAPAK 3

**Nungtugu goal keeper Kasper Schmeichel asaya nungi anisungzük**

**Int arrtsü nung ozüng alema yanglua aliba ki-o-jen ajak raksajang: Amit Shah**



VOL. XXIII ISSUE NO. 224 (ADOK 224) DIMAPUR YANGTEPNÜ (THURSDAY) MONUPII (MAY) 28, 2026

₹ 5.00

## Centre-i NZP indang ali agütsütsü mulunger

**Dimapur, May 27, 2026 (TYO):** Rangapahar Reserve Forest kübok Nagaland Zoological Park nung 220 kV transmission line ka amenoktsü atema Union Ministry of Environment, Forest & Climate Change, Regional Office, Shillong-i temelaba agütsütsüo.

Nagaland Power Department-i Dimapur nungi Kohima (Zhadima) tashi 220 kV transmission line ka yanglutsü atema Nagaland Zoological Park nung 3.93 hectares nungdaker.

Ministry-i February 12, 2024 nü Nagaland Power Department nem in-principle (Stage-I) approval agütsütsüo aser iba ya transmission line yanglutsü atema forest land agütsütsüba indang liasü.

Ministry-isa August 25, 2025 nü shidi ka yokba nung final approval asüba indang metetdakja liasü.

Iba nung ajemdaker sorkari

Divisional Forest Officer, Nagaland Zoological Park dang Nodal Officer (FC Act), PCCF & HoFF, Nagaland, aser Environment, Forest & Climate Change Department nem forest/wildlife clearance order agütsütsü tetuyuba agütsütsüo.

Iba mapatong atema lateta aliba Act/Rules kübok clearances nungdakba ajak agütsütsüla, requisite fees enoktsüla aser court orders kar lira itemji agütsütsüla ta sorkar sangdong ka nung shiogo.

Sorkarisa Divisional Forest Officer, Nagaland Zoological Park dang mapang shia Nodal Officer, FCA nem monitoring reports agütsütsü metetdaksütsüo.

Nodal Officer, FCA ket nung Nagaland Zoological Park nung ali indang GPS readings aser polygon map den handing over and taking over certificate agütsütsüla ta sorkarisa ashi.

## East Dimapur nung jana meindoktsü mepishir

**Dimapur, May 27, 2026 (TYO):** East Dimapur telongtet nung nübertemi lenmang aser public tesemtem nung jana meindoktsü metetdaksür ta East Dimapur Town Council-i sangdong ka nung ashi.

Ibala inyakim ya tesem menenmechiba dang masü temang asoshi meputep, kilentzü ayimdak tangbanger aser nübertem asoshi tashidak bentsür arutsü ana nung lir. Anungji onoki sensotem dang tebilemtsü bena

inyaksangshitsü aser merükmejutsü mepishir ta EDTC-isa metetdaksütsüo.

East Dimapur Town atema designated dumping site maliba ajanga nübertemi timtem ajuruba angateta lir aser iba asoshi bangdakpurtemi dumping site ka bushidar. Anungji iba mapa ya metembang tashi public-i aremzüka atatsü aser lenmang o public tesemtem nung jana meindoktsü mepishir ta parnokisa ashi.

## Assam district shia nung medical, engineering college & university lapoktsü

**Guwahati, May 27, 2026 (TYO):** Assam nung taruba terenlok shilemji lanurtemi anir inyaksü aser iba asoshi district ajak nung higher education aser professional institutions ulushitsü ta Chief Minister Himanta Biswa Sarma-i ashi.

Assam nung district shia nung youth development aser opportunities pusema nungittsü atema tongti reju asem alitsüla ta CM Sarma-i ashi.

Sorkari "one district, one

institution" framework latetba kübok district shia nung medical college ka, engineering college ka aser university ka alitsüla ta pai ashi.

Iba mapa ya shisaliok zübazüba ngudaksütsü aser state nung lanurtem asoshi maongka tajungtem agütsütsü atema lir ta Sarma-isa metetdaksütsü.

Tesüiba küm ishika Assam nung district balala nung medical colleges, universities aser engineering institutes lapoktsü aser lapoktsü asoshi inyaka arur.

## Dimapur nungi Government Hindi Institute belena meyoktsü: DNSU

**Dimapur, May 27, 2026 (TYO):** Oriental Colony, Dimapur nung aliba Government Hindi Institute belentsüba lemtet magizük ta Dimapur Naga Students' Union (DNSU)-i metetdaksütsüo.

Government Hindi Institute ya Dimapur nungi Chümoukedima district kübok Medziphema nung In-Service Teacher Training Institute-i belentsü sentong lir.

Iba lemtet ajanga kaketshirtem asoshi mebilemtsü sayur kechiyong Nagaland nung educational centre tongtibaji

Dimapur ama züngshir ta DNSU-i sangdong ka nung ashi.

Ozüng alema ali atsünga agiaka campus sadema dang lir anungji ali meyipa agütsü mesüra tang aliba ali amshitsü melena reju belentsü lemtetba ya magizük ta parnokisa metetdaksütsüo.

Sorkar dak rejutem kümzüka ayutsü aser tashi itdaksütsü tebilemtsü khuret lir. Anungji terenlok tenüng amer reju ka belener Dimapur nung nungdakba educational

infrastructure ka agienba ya tim masü. Tangalen infrastructure tasen yanglur Dimapur nungi rejutem belena bener maotsüla ta DNSU-isa ashi.

Parnokisa state sorkar dang lemtet meyipa reprangshitsü aser kaketshirtem asoshi bilema mapa inyaksü ayongzükogo.

Sorkari item tebilemtsütem asoshi meinyakra onoki kaketshir temetentem aser ajak kasa terenlok asoshi ozüngi melaba ama mapatem inyaksü ta DNSU-isa metetdaksütsüo.

## MP Supongmeren-i GDS mapa nung yariteper ajak dang pelar

**Dimapur, May 27, 2026 (TYO):** Nagaland nung Gramin Dak Sevaks (GDS) indang recruitment policy reform atema inyaka arudang Home Department, GoN, MLA Dr. Tseilhoutuo Rhutso, Chief Secretary Nagaland aser Director Postal Service Kohima Dr. Alice K. Vizo nungeri yariteperba atema kanga pelar ta MP S. Supongmeren Jamir-i metetdaksütsüo.

"Department of Posts,

Government of India kübok Gramin Dak Sevaks (GDS) maparen nung Nagaland nung tribal local languages & dialects 19 agizüktsüsa inyaktetba atema sendaktepa alir ajak nem tenüngsang agütsür" ta MP Supongmeren-isa ashi.

GDS recruitment ya tesüiba nung all-India basis nung liasü saka iba mapa ajanga Nagaland nung recruitment process nung notified tribal languages ajak

adentsü lemtetogo aser iba ajanga Nagaland nung lisopurtem taginüba aser maongkatem kümzüka ayur ta paisa ashi.

Department of Posts, Government of India-i May 21, 2026 nü Office Memorandum agütsüba pelashishia agizük kechiyong iba ajanga Nagaland nung GDS engagement atema notified tribal local languages/dialects agizükba shia lir ta MP S u p o n g m e r e n - i s a metetdaksütsüo.

## MoH&FW-i NIMSR ajungkettsü aser Green Field MC lapoktsü nangzük



Union Minister J.P. Nadda aser Minister P. Paiwang Konyak na New Delhi nung ajurutepdang agiba noksa ka angur.

**Dimapur, May 27, 2026 (TYO):** Union Minister for Health & Family Welfare, Jagat Prakash Nadda-i Nagaland Institute of Medical Sciences and Research (NIMSR), Kohima ya super-specialty institute ka akümtsü aser Naga Ki City, Chumukedima nung Green Field Medical College lapoktsü nangzükogo.

May 27, 2026 nü New Delhi nung Union Minister Nadda-i Health & Family Welfare Minister P. Paiwang Konyak den ajurutepdang iba tenangzükba agiogo ta Deputy Director & Sr. PRO IPR, Nagaland House, New Delhi-i sangdong ka nung metetdaksütsü.

Nagaland nung healthcare services aser infrastructure akangshitsü atema tebilemba

abenba ajak nung akokba tashi yariteptsü ta Union Minister-i ashi.

Minister Paiwang-i NIMSR, Kohima, (PMSSY) jenjang ajungkettsü atema tebilemba lemsatepdang "state sorkari MBBS students mezüngbuba batch pur 2028 nung course atemtsü aliba meteta PG courses tenzüknür" ta ashi.

NIMSR, Kohima, (PMSSY) nung PG courses tenzüka ajanga Nagaland nung specialist doctors peria maliba khuret ajema akümtsü ta Paiwang-isa metetdaksütsü.

Paisa Union Minister Nadda dang Naga Ki City, Chümoukedima district nung Greenfield Medical College ta ser AIIMS institute ka lapoknüba aser iba ajanga Nagaland nung tertiary

healthcare, medical education aser specialist services nung teyari tulu angutsü ta ashi.

AIIMS amenokba ajanga Nagaland nung dang masü saka temeket aliba state tem ajangzüktsü aser India sorkar indang Act East Policy den liromedema medical tourism ajungkettsü ta Minister Paiwang-isa metetdaksütsü.

Paisa Centre sorkar dang National Programme for Prevention and Control of Cancer, Diabetes, Cardiovascular Diseases and Stroke (NPCDCS) kübok State Cancer Institute ka amenoktsü atema mepishi.

"Nagaland nung cancer kanga bulua adoker aser iba jagi advanced oncology services aliba reju ka nungdaker. Ano, National Mental Health Programme kübok State Mental Health Institute ya Centre of Excellence ama ajungketdaksünür" ta Paiwang-isa Union Minister Nadda dang ashi.

Paisa Kohima nung State Allied Health Professional Institute ka amenoktsü aser Nagaland nung tanüngba district 12 nung Accident and Trauma Centres amenoktsü mepishi.

Iba senden nung Ministry of Health & Family Welfare, Government of India nungi tongti ketdangsurtem aden.

**OFFICE OF THE  
AO SENSO TELONGJEM DIMAPUR**

Dimapur - 797112 : Nagaland  
Regd. No. H/RS-866 | dt. 24.07.2000  
"Telongjem aser Terenlok"

**SANGDONGER**

Ao Senso Telongjem Dimapur (ASTD) Lokdi Inti mungdang ka 29th May 2026, 3:00 pm shitak nung IMC Hall nung alitsü. Anungji Ao Senso süngpo nungi puti tashi iba mungdang nung adentsü ASTD mendenti nungi ajangajanga sangdonger.

Sd/-  
President, ASTD

Sd/-  
Gen. Secretary, ASTD

# Dimapur nung Field Trainers training tenzükogo



Dimapur nung Field Trainers training agiba mapang tangokba noksa angur.

**Dimapur, Monupii/May 27 (TYO):** Census of India 2027 indang First Phase asoshi renemshia Dimapur, Niuland, Chümoukedima, Peren aser Mon districts nungi ketdangsür atema asemnü Field Trainers Training sentong Circuit House, Dimapur nung May 27, 2026 nü tenzükogo.

Iba training sentong ya May 29, 2026 tashi alitsü aser Directorate of Census Operations, Nagaland nungi totuyuba agüja aliba ama ayongzük. Field Trainers nem Census exercise tajungtiba nung agitettsü asoshi nungdakba ozüing, technical, shisatsü aser inyakyim angazükdaktsütsü nükjidong nung iba training ya ayongzük.

Training tenzüka Deputy Commissioner & Principal Census Officer, Dimapur, Dr. Tinojongshi Chang, NCS-i jembidang, Census dak sendakba mapa inyaktang renema alitsü, amalitep akatsü aser shidak inyaktü tongtipang, ta ashi.

Census exercise ya linük nung administrative inyakyim tulutiba rongnung ka lir, anungji ketdangsür temi pei mapa nendaka, temulung agütsür shidak inyaktüsüla, ta pai ashi.

India nung Census Rules, 1990 kübok census ya agia arur aser iba inyakyim nung tilatiba geographical level nunga demographic, economic aser social data bendena kanga junga asadanger, ta ashi.

1872 küm nungi nütsüing yongsük züingdangba maparen ua küm ter nung khen inyaka arur aser tesüsa 2011 nung agi,

ta pai ashi.

Census 2027 ya temelenshi tuluka asütsü, kong data bendentsü atema digital oset aser modern technology amshir. Taküm census ya digital platforms aser mobile applications ajanga agitsü, kong real-time monitoring systems agi yaritsü, ta DC Dimapur-i ashi.

Digital house-listing, digital data collection aser enumeration aser monitoring process asoshi Artificial Intelligence amshiba densema features tasen aika amshitsü.

Census indang mezüing phase, House Listing of Housing Census ya July 1-30, 2026 mapang agitsü aser self-enumeration facility ya June 15-30, 2026 tashi alitsü, ta Dr. Chang-i metetdaksü. Population Enumeration phase ya February 2027 nung agitsü sentong lir.

Pai House Listing Blocks (HLBs) atema renemshiba aser layout maps ya Phase-I inyakyim nung tongtipang component ka lir, ta ashi. Enumerators temi yangluba layout maps nung nisung aliba ki, lenmang, lenti, lanes aser tanga tongtipang tesemtem designated enumeration areas nung aliba inoktsü aser Census 2027 takok ngua agitsü ya field-level planning aser enumeration maparen shidak inyakba dak keta lir, ta pai ashi.

Iba training mezüing anogo Census concepts, definitions aser enumeration mapang amshitsü yimyatem nung rangloker sessions tem agi.

Ketdangsürtem enumerators aser Supervisors den külemi

inyaktsü yimyatem, House Listing Block boundaries jangjatepba, layout maps yangluba aser HLO Mobile Application amshiyim indang angazükdakja liasü.

Iba training ananü buba tenzüka recap aser quiz session alitsü aser iba sülen HLO indang tejangjaba nung lemsatepa Enumerators aser Supervisors nem Census nükjidong rateta ashitsü yimyatem sayutsü.

Practical demonstrations nung HLO app ajanga telangzübatem inokba yimyatem, Supervisors temi data verification atema inyakyim aser self-enumeration exercises mapang Enumerators aser Supervisors teinyaktsütem densema sayutsü.

Census 2027 nung digital data collection tali amshitsü aliba yong iba training mapang mobile applications shidak amshitsü indanga angazükdaktsütsü.

Asemnü buba nung training agir nem Census Act and Rules indang orientation agütsütsü, kibong tem den sensaksemba yimya, census agitsü memulungba mesüra tensa balala ketdangsüba, asüingdangyaba yimya aser courtesy protocols tem indang sayutsü.

Shilem agirtemi anasa aliba tesemtem semdanga sample layout map yanglutsü aser data collection mapa inyaktü.

District pongu nungi iba training nung adenertem ya Census operations mapang pei aliba tesem nung Field Trainers ama inyaktü.

# DC Phek-i ASF indang metetdaksür

**Dimapur, Monupii/May 27 (TYO):** Deputy Commissioner, Phek, Rhosietho Nguori-i nüburtem dang sangdong ka nung, Phek district kübok Khuza yimtsüing nung African Swine Fever (ASF) pokteta lir ta metetdaksüogo.

Khuza yimtsüing nung ASF aliba osang tejangja Office of the Chief Veterinary Officer, Phek nungi aruogo. Anungji Khuza yimtsüing aser kilometer ka telongzük ya Infected Zone ta sangdonger, ta ashi.

Maneni kilometer 10 temeket Khutsokhumo,

Mutsale, Phek Town, Phugwi, Sohomi yimtsüingtem ya Infected Zone alitsü.

Anungji item tesemtem nung tang nungi tenzüka tarutsü nung sangdong ka magütsü tashi ak tepsetba, ak aser ak chanu bener aruba aser aoba, ak shi bener aruba aser aoba ajunga nokdang, ta sangdong ajanga ashi.

DC Phek ajangasa nüburtem dang ak dak temulung melemtetsü yimya aliba mesüra ASF ajanga ak asüba osangtem tekeratiba nung Office of the Chief Veterinary Officer, Phek nem metetdaksütsüla, ta ashi.

# NSSA-i Mhathung Tungoe den tepila sentong agi, 55buba NSS Batch pela agizük



**Dimapur, Monupii/May 27 (TYO):** Secretary, School Education, Mhathung Tungoe nem akhum agija tepila sentong aser 55th NSS Batch pela agizükba aser lokti senden ka May 27, 2026 nü Secretariat Conference Hall, Nagaland Civil Secretariat, Kohima nung agia liasü.

Mhathung Tungoe-i sentong nung tepila o jembidang, mapa nungi anisüingzükba ya takum nung stage ka nungi kati melenba lir ta ashi. 55th NSS Batch tasenpur pela agizüka jembidang, ibai nübur tenzükba mapa generation tejenba nungi generation tasenbai agizükba temaitsü lir ta ashi.

Pai junior officers dang bendanga agütsür tejangraba tulu nung mapa inyaktü ajungmeso aser sorkar mapa inyakba nung tangatetba tajung aser mapa inyakba yimya shidak nüngdaker, ta ashi. Pai ketdangsürtem dang bendanga magütsüi aser yimya shidak mamshie mapa inyakba ajanga tesüleni atsüingzükba aotsü aser system nung timtem akumtsü, ta tekumdangtsü ashi.

Batch tasenpur dang department ajak nung meranga aser nendaka inyaktü ajungshia jembidang, pai parnok dang sorkar indang paidoktsü makokba assets ka-ka akumtsüsa alitsü ashi. Paisa mapa inyaktang ochishia aser indang-indanga alitsü nenshia ashi.

NSSA tenüing nung P. Nungsangwapang Jamir,

Secretary, Planning & Transformation ajanga jembidang, iba sentong ya temulung shirangba aser tetetzü tajung aliba sentong ka lir, ta ashi. Pai ketdangsür tasentem dang Secretariat indang 'work culture' yimya sübatsü aser yimya tajung aser mapang shidak amshitsü aser bendanga agütsütsü ayongzükba liasü.

Sorkar tenzükba nung bendanga agütsüba, teamwork aser angazütsü mulunga aliba nüngdaker, aser ketdangsürtem telungjem aser amalitep tongtipang lir, ta ashi.

Pai mapa nungi anisüingzük angusang-i mapa nung bendanga agütsür inyakba bilemteta jembi aser pa ajanga külem tenzükker aser department ajangzükogo ta tenüngsang agütsü.

Neiserü Miachieo, Deputy Secretary & President, NSSA ajanga Mhathung Tungoe nem tenüngsang agütsü aser association tenüing nung pelaba lemsatepa liasü.

Iba sentong nung V. Angela Sophie, Deputy Secretary & Vice President NSSA menden liasü aser 55th batch tenüing nung Azizu Marcel I Sangtam SA ajanga o tatsüka jembi.

Sentong nung 55th NSS Batch pur pei sasa metetpelaba mapang agi aser 55th NSSA batch ajanga temeja ken ka aten. L. Vutoli Chophi, Section Officer, NSDMA ajanga temoatsü meshija sarasadem aser session tanabuba nung lokti senden agia liasü.

# Advisor Sethrongkyu Sangtam-i Holongba yimdak guest house semzüktsü



**Dimapur, Monupii/May 27 (TYO):** Advisor, IT & Communication, Economics, Statistics and Evolution, H. Sethrongkyu Sangtam-i May 26, 2026 nü Holongba Village nung Holongba Baptist Lithro Guest House semzüktsü, koba 2025-26 mapang Nagaland sorkari LADP (ICONIC) Project kübok yanglua liasü.

Sangtam-i iba sentong nung jembidang, Tsüngremi temoatsü agütsüba asoshi tenüngsang agütsü aser pa mangdang asangsang kumtetba asoshi pelaba lemsatepa liasü.

Nüburtem lungjemer inyakra, teti lokti tajungba akumtsü, ta pai ashi aser Sangtam nung dang ochi nung nüburtem anitsü

ayongzükba liasü.


Iba sentong nung BJP Mandal, 52 A/C Longkhim-Chare tir A. Rangkha-ia tajungshi o jembia liasü.

Advisor meina BJP Mandal, 52-Longkhim-Chare A/C tir, Party Workers, GBs aser yimtsüing lenirtem iba sentong nung aden, kong Youth Pastor, Liripila menden sür agia liasü.



MLA & Chairman, Committee on Environment & Climate Change, Achumbemo Kikon aser par committee züingsem temi May 27, 2026 nü Pfutsero semdangba mapang tangokba noksa ka yangi angur.

### CPI(M) worker temi Vijayan'er ki meita aoba ED team amak



**New Delhi, Monupii/May 27 (Agencies):** Taoba Chief Minister Pinarayi Vijayan'er ki meita aoba ED team mena aliba gari CPI(M) worker tem amakba sülen Thiruvananthapuram nung mepetmesü adoka liasü. Cochin Minerals and Rutile Limited (CMRL) ken o dak sendakba nung Vijayan'er ki meita ao.

CMRL ken o dak sendakba nung Kerala kübok Pinarayi Vijayan'er ki densema ED-i tesem 10 meita aoba sülen nübürtemi longkak aita liasü.

Longkak aiba tesem nung tangokba video tem nung party worker tem Vijayan'er kima adenshia central agency anema yimyi ayimba mapang nanüng

tulu adokba nguogo. Lokti azüoktsü aser mepetmesü tamajungba küma meyoktsü atema iba tesemi police tem yoka liasü.

Longkak aiterem senshidakja tensa azüoktsü merangba mapang police ka yirua liasü.

Enforcement Directorate-i Bodhbarnü Kerala kübok tesem balala meita ogo, kong taoba Chief Minister aser Opposition lenir Pinarayi Vijayan indang para ki densema lir.

Cochin Minerals and Rutile Limited (CMRL) ken o dak sendakba nung iba meita aoba sentong ya benoka inyakogo, kong Vijayan'er jala Veena Thaikkandiyil indang firm

Exalogic Solutions Pvt. Ltd densema lir.

ED - i s a , Thiruvananthapuram nung pa tang tildak ki meita oa liasü. Iba kidang Veena Thaikkandiyil-a telidak lir, ta osang ajanga metetdaksü.

Veena meyong IT firm Exalogic Solutions tang bushisüngdanga aliba dak sendakba nung meita aoba sentong ya benoka liasü.

Kerala High Court-i, ED-i CMRL bushisüngdanga aliba anentsütsü asoshi mepeshiba magizükba sülen anogo ka lir iba meita aoba sentong ya benoka liasü, aser iba ajanga company aser ketdangsurtem asoshi tetsükdaksü tulu adokdaksüogo.

### NEET paper leak asüba ken o nung ano nisung 2 puogo

**New Delhi, Monupii/May 27 (Agencies):** NEET-UG 2026 examination paper leak asüba ken o nung Central Bureau of Investigation (CBI)-i Latur nung amendaker aliba doctor ka aser coaching centre ka indang faculty züngsem ka puogo.

CBI-i iba ken o dak sendakba nung tang tashi nung nisung 13 pua lir.

Pua aliba medical professional ka ya Dr. Manoj Shirure ta jangjaogo, pai kaketshir asem nem Chemistry questions agütsüba nung tongtibang shilem agia liasü. Kaketshir asem rongnung ya kabo coaching centre kibur ka jabaso lir.

Bushisüngdangertemi ashiba agi, Dr. Shirure-i question tem ya ken o nung aija alir P.V. Kulkarni dang meshia liasü.

Kasa mapang nung CBI-isa, Tejas Harshadkumar Shah puogo. Pa ya Dr. Abhang Prabhu Medical Academy (APMA) nung physics faculty züngsem ka lir. Iba Academy ya Pune nung kanga nüngtugu coaching institute ka lir.

Osang ajanga ashiba agi,

Shah-i iba medical entrance tatidang atema Physics question ya Manisha Havaladar dang meshia liasü, shiba CBI-i pua lir.

Ministry of Education kübok Department of Higher Education-i tezüluba nung tashishiba ka agütsüba sülen Federal agency yagi 2026 küm May 12 nü ken o benoka liasü.

Ken o agizükba sülen CBI-i specialized team tem tentettsü, aser linük ajunga nung tesem balala meita ao tenzuka liasü. Tang tashi nung tesem 40 meitaogo aser iba mapang laptop, mobile phone tem aser tashishitsü aketba kuli kaket aika ngutetgo.

Bushisüngdang ya Delhi, Jaipur, Gurugram, Nashik, Pune, Latur, aser Ahilyanagar yimtem nung asü aser tatidang magi tsüngda Physics, Chemistry, aser Biology question leak asüba tera nguteta liasü.

CBI ketdangsurtemi ashiba agi, ken o nung sendaka aliterem ajak aputsü atema special team tem inyakdar aser parnoki pua aliba digital kulitem tang kanga junga asadangba mapang ka lir.

### Tamil Nadu CM Vijay-i PM Modi den ajurutep



**New Delhi, Monupii/May 27 (Agencies):** Tamil Nadu Chief Minister C Joseph Vijay-i Bodhbarnü New Delhi nung Ato Kilonser Narendra Modi den ajurtepa state dak sendakba ken o balala sensaksemogo.

Iba ita tetenzüklen Chief Minister mapa abentsü atema tenangzüktepa agiba sülen Tamilaga Vettri Kazhagam (TVK) tekolakba yagi tang mezüngbuba linük yimtiba semdangdar.

Senden nung Vijay-i senotsü teyari, infrastructure project tem, terenlok maparen balala atema temelaba agütsütsü aser Mokedatu nung tzü atema mangatetep adoker aliba bentettsüba densema Tamil Nadu-i mapang talangka nung khanga aruba ken o tem metetdakja PM nem tezüluba nung takhangba ka agütsü.

Tamil Nadu sorarkisa tanga tinyakdak aliba terenlok maparen balala atema Centre nungi teyari meshiogo aser urban infrastructure, transport aser industry tem atsülanga aotsü atema takaraba nung temelaba agütsütsü takhangba agütsüogo.

Sensaksem mapang Mokedatu ken o ya kanga tongtibangsa sensaksemogo.

Iba mangatetep ya Karnataka-i Mokedatu kübok Cauvery ayong nung balancing reservoir project ka inyaktsü benoker aliba dak sendaka lir. Iba mapa ya Tamil Nadu-i mapang talang ka nungi anema arudar aser ashiba agi, iba ajanga state nung Cauvery ayong dak kongshitsü. Iba ken o ya state ana tsüngda küm aika asoshi mangatetep adoka aruba ken o ka lir.

Vijay-isa, taoba mapang Centre dang Mokedatu project atema temelaba magütsütsü aser Cauvery tribunal framework kübok Tamil Nadu indang tzü temeden kümzuka yutsütsü mepeshia Ato Kilonser Modi dangi shiti ka zülüogo.

PM den ajurutepba den Vijay-i state project balala atema senotsü teyari meshitsü aser Tamil Nadu nem Centre-i senotsü timba lemzüktsütsü atema akhangtsü asoshi Union Finance Minister Nirmala Sitharaman den sensaksemtsü imlar.

Maneni Chief Minister yagi Delhi semdangba mapang Union Home Minister Amit Shah den ajuruteptsü imlar. Iba den bendeloksema Vijay-i Congress lenir tejen Sonia Gandhi aser Rahul Gandhi na dena ajuruteptsü.

### Intarrtsü nung ozüng alema yanglua aliba ki-o-jen ajak raksajang: Amit Shah



**New Delhi, Monupii/May 27 (Agencies):** Union Home Minister Amit Shah-i, ketdangsurtem dang linük international arrtsü nung km 15 tsüngda ozüng alema yanglur aliba ki-o-jen ajak raksatsütsü asoshi ketdangsurtem nem tetuyuba agütsüogo.

Ministry of Home Affairs-i, district magistrate tem dang arrtsü nung aliba bank tem ajaki bank nung senotsü tsütatepba ajak temzüng ozüng kübok inyakshangshitsü, business establishment tulutem jangjashitsü, parnok nem shirnoki senotsü agütsür aji jangjatsü, mule account aser

taila cimpany tem bushiteta aotsü, Aadhaar card taila jangjatsü aser arrtsü adena shibelenba azüoktsü atema tetuyuba agütsüogo.

Mongolbarnü Bikaner nung security lepareprangshiba senden nung Shah-i, India-Pakistan arrtsü len Rajasthan kübok arrtsü nung aliba district tem security dak sendakba nung ken o balala asadangogo.

Rajasthan Chief Minister Bhajanlal Sharma, state ketdangsur tejentem, district magistrate tem aser Bikaner, Jaisalmer, Barmer, Sri Ganganagar aser Phalodi indang superintendents of police temi

iba senden nung shilem agia liasü.

Home ministry-i sangdong ka ajanga ashiba agi, arrtsü nung aliba district tem dang ozüng alema inyakshangshiba aser temesepba mozü shibelenbatem kong nungi pokteter, koma inyakshangshi asür aser item nisungtem koda sendaktepa ali aji jangjatsü atema jenjang agitsü tetuyuba agütsüogo.

Shah-isa, arrtsü nung aliba district tem nung lisopur, state machinery aser security agency tem kümzuka ayutsü atema 360-degree security cover nüngdakba lemsatep.

Home minister-isa, international arrtsü nung km 15 tsüngda ozüng alema ki-o-jen balala yanglur aliba raksatsütsü atema ayongzükogo, ta ketdangsurtemisa ashi.

Paisa, ozüng alema linüki aitba, temesepba mozü shibelenba, kiralongrartem nem senotsü teyari agütsüba aser arrtsü adena ozüng alema inyakshangshiba maparen balala benoka inyakba nokdangtsü atema BSF, CBDT, NCB aser state machinery tem densema arrtsü kanga junga ketdang asütsü asoshi longjemer inyaktsü koda tongtibang iba indang lemsatep.



## TIR YIMYIM YIMOBILEM (EDITRIAL)

DIMAPUR THURSDAY, MAY (MONUPII) 28, 2026

### Leplu Telok

**T**awa linük nung tematiba obendangdak Supreme Court nung tongti obendanger, Chief Justice, Surya Kant-i linük nung mapa mangu kazür lanurtem ya azümasen aser leplu, Cockroach, mesük ta luja jembiba o anema lanurtemi shitakbabo masü saka asayamenüa yimten telok ka tenüng agi 'Cockroach Janta Party (CJP)' tentetba telok nung, anogo ishika tsüngda nisung crore 2 dak tali denogo aser tesem aika nung iba CJP telok yagi yimten nung ochimashi mapatem anema ola adok tenzükogo. Tongti obendanger, Surya Kant-i linük nung mapa mangurtemi RTI amshia yimten mapa nung timtem agütsür aser lanurtem aika YouTube nung mapang endoker ta lanurtem dak tajung tilaka danga mangu, parnok luja aser menüja, tanü linük nung lanurtem ya leplu mesüka ta menüja jembiba jagi, atangji, lanurtem aika temulung yirur alitsü aser iba jagi lanurtem aika mapa mangu tezüdanga ali nung, parnok nem teimla agüja ajungshitsü melen, kidang meinprongtsü tesempatsü leplu agi atishia jembiba jagi lanurtem ain adokdaksür. Atangji, tajung tsütsü amshidi asünungbo, leplu ya takümsangnutem rongnung timtem arema tesem ajak nung litetba shiruru ka lir, ajisüaka obendangeri jembibajibo tajung tsütsüji masü saka tamajung aser tamagitsü tsütsü atishia jembiba liasü. Aji oda, leplu ya chitokendok shia chia senzüba taküm sangnu ka lir. Leplu yabo shingaia machir saka kidang ki telong nunga meinperongtsüka arishiaka memenep senzür. Iba takümsangnu mesükbaji India nung mapa mengui alir lanurtem ya lir ta ashi nung shibaibo anganütsü. Iba jagi tongti obendangeri jembiba o ji jet ta jepzükur, Maharashtra nung arishi küm 30 Abhijeet Dipke-i Cockroach Janta Party ya tenzükur Social media nung enoktsü. Abhijeet Dipke ya yimten nung sentong yanglutsür ka lir aser tangbo pa US nung alir. Pa ya tamalenbo Aam Aadmi Party nung tongti yariteper ka liasü saka tangbo parnok dena tesendaktep mali, ajisüaka BJP teloki CJP tenzükba ya AAP kolok nungi adokba mapa amato bilemer. Atangji, pa o ajanga lanurtem jashiba ngua, tongti obendanger-i pai jembiba o ji lanurtem luja jembiba o masü saka tangatetba junga maliba obendangerem indang jembiba liasü ya jangjashitsü, ajisüaka ibaji menur jangjashitsüba o dang masü saka ajakbo ochi masü asü. Aji oda, asayamenüba agi ochi akümba amai, CJP ya tenzükur khen nung züngsema BJP dak nungi teimba aküm aser parnoki linük nung medical azüngtsü atema NEET tatidang agiba nung tasüngdangbatem jelia kar nem agütsüba agi tatidang agiba ajak amajok akümba tai asoshi, linük nung Education Minister Dharmendra Pradhan menden nungi alutsüla ta CJP nungi nisung lakh trok shii sign ser takangba ka agütsü. Iba tatalokba ya kodang jungjunga bilemdangdir, linük nung mapa mangu aser temulung masüba lanurtem aika jashiseta aliba tia ka angur. Aji oda, mapa mangu tezüdanga aliba lanurtem nem teimla agüja mapa inyaksü len teyutsü melen, parnok takümüji tagidak makaba takümsangnu leplu denang atishia jembibaji totzü nung mi tsükloktsü amai akümütsüba mapa ka lir. Tanü asen lima nung lanurtem aika mapa mangu ser timtem shisabolu tia nung lir, anungji parnok nem shisa len tajung sayua mapa inyaksü lenmang teyutsüba kanga nungdaker. Atangji, alima yimya asünungji lanurtem dang masü saka taintem rongnunga nisung aika azümesenba purtem lir, ajisüaka mapa mangu aliba lanurtem ajakji azümesen kümtsüra aser YouTube aser RTI amshia nübortem ajangzükdaksütsü inyakterem ajak leplu kümtsüra, atangji, ibajibo tongti obendanger bang nungi adokbo memesük asütsü. Shiba südir sang, lanur asüdang mapa mangu ser tsüraburtem nem mesüdakja aliba taji mulungzüka aliba mapang masü. Parnok mulungjang nung tasüngdangba aser tebilemtsü aika lir, iba jagi parnokji melamelaa ain adoker aser parnoki parnok taküm samatsüba mapayur, kechiyong parnok taküm nung teimla mali kuma aoer. Aji oda, tongti obendangeri lanurtemi manganütsüsa o ka ana jembiba agi, lanur crore ana agi yimten telok CJP tenzükur government dang mapa ajak nung idangindanga ochishia inyaksü takangba agütsüba jagi, linük nung yimteni lanurtem mulung chidakja meinyaktetba tamakok aser teinyaksü khuret indang teinyaksü watang tuluka sayur.

## OLEMSABANG

### MERAJEMBA TEKUREM

~ L. Temjenwapang

*(Iba Yimjangjem otsü ya Tir Yimyim aser Bookipedia nati ayongba toktep nung shilem agirtem rongnung ka liasü)*

*(Yashi adok nungi...)*

Joko Wangshibatu la jembishinü nungji jung junga pua aser mapai aotsü tu matateter, anogoshia pa mapai aotsü tejangrabaji onsara tulu liasü, kechiyong pa tebilemba ka lir. Mapang tatsüka latu lenmang nung mesüir aser mangur, anungji pa kanga ratar ken-kenbo mangatonga mapa nungji nokdak danger, saka la tu mesüir, pa temulungjang tip matemer joko itaka shi süia ao. Kenü ajungbena ka ayirlaji aruya angu. Wangshiba; Aya tzükonglar, ya koda asü? Ayongpangtsü tu joko ayonglang nungibo meyiba matutetsüji ta sasa ali-a tu ya.

Tzükongla; Kechibaka, ayonglang nungi tzüsü atuba ajanga anüng nungi tzünglu arua tanaben ayongbangtsüji ayim tenzükur atu ya. (yamaji tena kanga menütep)

Wangshiba; Tanübo otsü ken atongti ta sür pai yakta longbak ana bushia ala aser yangji tena ka ka nung amen, idangji lai ashi, ni temang tera majungba ajanga itaka shi nüngdak mejajatet. Wangshi; Haoja nia kanga rata liogo tzükonglar, ya na kechi nüngdak sa jajar? Ni tsümalen nungi tilateri belena shishilembar aja. Kanga junger, süra ni langka shidi ni? ta sür Wangshiba tejak ajak merema asükshijang ajak tangteta aküm aser züngzünga mementet. Lai aji ngua'na scü alur masü südi ya? Wangshiba: Masüago (terok ajak konger tanemi ashi) Nai melungra ana lidi ni?

Tzükonglar; Tsürabur dang asüngdangteplaba, ta sür senshi. Joko tsürabur anatsülen nungi mulungtepa Wangshiba aser Tzükongla na sati kuli tajung agia kibong aküm. Kobi meli tetsü o tebu naprong süadok. Wangshiba aser Tzükongla na jala tajung kati sosemmer küm ishika pelatepa jangratema lia aru, saka Wangshiba asoshi terongjen tulutibaji pa kibong kümer mapang tatsüka tsüngta nung kanga dang meimtepa aliba tetsü aser tebu naprong süadokba asoshi pa dangi timtem shisabolu aru dang khuret lemsatepa asüngdangya shisatsü angudak maka aküm. Aser ano külen reprangdangra, kinüngtsü bendangtsür anungji timtem tushi nung yariteptsü anük apang tajung mali. Akidangbo tsürabura kibong tajung aser tejungnü tesüngmangtsü awashia meteta lia aru, anungji yimer ajaki kanga aküm agüja timtem nunga yimer ajaki yakta dang ajiteta shisatsü nung süshia akialu maparen balala ajak nung yaritepa aru. Saka tanübo Tzükongla tu onsara shira agi Wangshibai yimtsür yimer tem den jongteptsü lenmang mesademi aküm. Anungji tanem- tanemi yimer ajaki sendoktsüsa aküm. Pa mapai ao dang mezüng Tzükongla jembishinü nung kanga junga pua, anungji tanübo joko pa jembinüba mejembiteteter ano pai inyaknüba meinyakteter, oda tanübo Tzükongla o agi pa taküm kanga junga alendaktsü aser ola madokteti iba khuret jagi alima nung pa kija alir ama kümogo. Wangshiba asoshi ibaji akümlir molumi liasü. Kechiba süra pa lanuwa nungi temeim, tejungnü shisatsüji pa dak liasü. Ken kenbo maremteti kiyong kidanger timtemer kar den danga yaritepra oda kinüngtsü Tzükongla jagi mapa yariteper mechiyongtsütsü masüji na asoshi taonungbo chibu nung jang mesüoktsüa tasa ashi. Iba ama maparen nungi, mapang shia kidang kironng dena rongrongtep. Idangji yimertem jagi Wangshibar kibongji reprangangjo bendangtsür agia yur kidang yamai rongrongteper ta merametsüa jembitepaji pa narongi angashir aser idangji taak-a aaker ano temulung kanga shiranga bilembaji, ni kütsü o kübo na den alidangbo parnok ajak ya ozüi meyaridangba kibong ka danga mali ser nung, oja o oba na mali yong kala ozü tanü yamai timtem dangbo o tajung ka agi kü mulung süngzüktsür-a malia naya ta kanga temulung shiranga tetsü o tebu par asem meimtepa aliba tu bilemteta memeteti pa tenük nungi nüktzü alu.

*(Maneni asüng adok nung...)*

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

Indonesia Catholic nungeri Muslim nunger Eid benjong atema teyari agütsü



Central Jakarta nung aliba Saint Theresa Church indang parish priest Jesuit Father Benny Beatus Wetty (achichi) ajanga May 26, 2026 nü Ijtihad Mosque nungi Muslim nunger lenir Ustaz Harun Al Rasyid nem Eid-ul-Adha benjong asoshi nashi ka agütsüdang tangokba noksa nung angur.

**Jakarta, Monupii/May 27**

**(Agencies):** Indonesia nung aliba Catholic nungeri tamangba yimsü balala tsüngta temeimtep aliba temaitsü Muslim nunger nem Eid al-Adha benjong atongtsü lia takum tenla atema shiruru agütsü ta osang ajanga ashir.

Linük yimtiba, Jakarta nungi Khristanpur longsoa aliba Indonesia anüdoklen tashi Catholic nungi kija aser arogo nung amendaka aliba telok balalai May 27 nü iba benjong amungtsü lia nüngdaka aliba Muslim nunger nem nashi aser sakoli tenla agüja liasü.

Iba benjong mapang alima nung Muslim nunger million aikati shiruru tepseta kinunger aser makamaiter densema tangar den shi lemsaa achir.

Jakarta nung aliba Cathedral of Our Lady of the Assumption ajanga Istiqlal Mosque nem tenla agütsütsü asoshi shiruru agüja liasü. Iba mosque ya Southeast Asia nung tulutiba rongnung ka lir, aser ibai Cathedral of Our Lady of the Assumption jakdang lir. Mosque nem sorkar ketdangsür densema tangar temia shiruru tenla agüja liasü.

Iba mosque indang Grand Imam Nasaruddin Umar, shiba Minister of Religious Affairs lir, pai iba ama shilem agiba ya lemsatepba yimya nung shilem ka lir ta ashi.

"Onoki nisung mashi dang, tamangba yimsü balala süaka, lemsatepba nung shilem agitsü, talisa eid al-Adha mapang, ajungshir, kechiaser shi lema agütsüba ajanga nübur den yaritepba ya tetetzü tajungtiba lir," ta pai ashi.

Central Jakarta nung aliba St. Theresia Parish-i May 26 nü Karet Tengsin aser Tanah Abang nung aliba Muslim nunger nem nashi ana agütsü.

Iba arogo nung putir Jesuit Father Benny Beatus Wetty-i ashiba agi, iba inyakyim ya akhi alemli mapang nungi tamangba yimsü balala süaka putepa aser kati ka akumtsüboteba aruba nungi adok.

"Tatok agütsüba, kasa ama bilemba aser akumtsüboba tanüla nung külemi inyaksangshi maneni alitsüla," ta pai Ijtihad Mosque nungi ketdangsür Ustaz Harun Al Rasyid nem nashi amoktsüba mapang ashi. Iba arogo indang interfaith relations section nung tekolakba, Cheppy Wartono-ia tamangba yimsü tulu ajunga nung angati teyari agütsüba aser kati ka yaria telungjem asoshi inyakba ya kasa lir ta ashi.

"Tamanger takum asoshi tongtipang teinyaktsüji humanity lir," ta Wartono-i ashi.

Yangji aliba Muslim nunger lenir Ustaz Babay-i ashiba agi, iba arogoi küm aika Muslim nunger yaria arur aser tamangba yimsü balala tensendaktep tashi aittsü asoshi shilem tajung agia arur.

"Iba ama tenla agütsüba ya tan agi trokben buba lir," ta pai ashi.

Khristanpur timba aliba East Nusa Tenggara province kübok Flores asetkong nung aliba Labuan bajo densema tanga tesemtem nunga iba ama shiruru tenla agütsüba ya lir.

Labuan Bajo indang Bishop Maksimus Regus-i Al-Munawwarah Terang Grand Mosque nem nashi ka agütsü.

Iba nashi agütsüba sentong nung bishop asr Catholic nunger tem ya Muslim lenirtem aser sorkar ketdangsürtem lia traditional Manggarai süoshi semer agizüka liasü.

"Adianu temaitsü aser Muslim nunger kibong tem nem teyari ama onoki bendanga agütsütsü shiruru ka sempet ama bener arutsür," ta bishop-i ashi.

Al-Munawwarah mosque indang imam Ruslin-ia iba yimya ya tetetzü tajung lir ta ashi.

"Bishop aliba ajanga Muslim nunger temi tenla agütsütsü renemshiba mapang onok tashi itshidaktsür, aser kasa mapang yangi mapang talangka temeimtep nung külemi lia

aruba Catholic nunger kibongtem den ka ama bilemba akangshir," ta pai ashi.

Indonesia nütsüng yongsük million 280 shi aliba nungi shilem 87 shi Muslim nunger aser shilem 10 shi Khristanpur lir ta ashir.

Taküm Eid al-Adha mapang shiruru 2.36 million tepsettsü lir, ta Ministry of Agriculture ajanga ashi.

ANOGO ABEN TSÜNGREM DEN

Ain adokang

"Temenen aser memeshiba nisungtem, shirnoki memeshiba nung ochi nungtemer, parnok anema Tsüngrem ain adokba kotak nungi jungkai adoka lir" (Rom 1:18).

Tsüngremi temulung memeyipba pur madak ain adoker kechiaser parnok mesamadaktsüner. A.W. Pink-i ashir, "Tsüngrem ain adokbaji pai teti taochi nung tamang kateta ochi shia ayuba ajanga sayur. Aser iba asoshi kecha tashishitsü mali". Tsüngrem ain adokba shisatangdang, item onüktem asen mulungjang nung bilemtetdi; Tsüngrem ain adokba aser taochi nung kecha tetsüktep mali. Pai temenen pur dang teti meimer aser aochir, saka temenen den pai kodanga hai-aura makar. Temenen pur meimer saka temenen dang taochi mesayui merenshir.

Nisungi Tsüngrem temeim sendokra iba melen temerenshi angutsü. Nisung asoshi talidak ana dang lir- kotak aser molumi. Na ka mesüra ka nung alitsü. Kotak sendokra molumi, molumi sendokra kotak. Saka Tsüngremi molumiji nisung asoshi meyanglu, mojing asoshi dang yanglu (Mt. 25:24). Kibubai tamajungerji mesüdaktsüner, saka Khrista magizükertem asoshi temelen mali.

Obendangbaji Tsüngremer tebangkatsü mapa lir (Is. 28:21). Pai ajak dang taochi ang sayuner, saka temenen dang aochitsü makok. Ain adoka temenen memenatsü asoshi Khristantem aja (Ef.4:26). Koba mapa aser jakla agi Tsüngrem sentsüwangshi menentsür, iba madak ain adoktsüla.

South Korea Catholic lanurtemi arütsü nung yimjung asoshi sarasadem



South Korea nunger Catholic lanurtem May 22 nü Paju city nung aliba Odusan Unification Observatory jakdang yimjung, jungtepa alitsü aser libajen wazüka ayutsü asoshi sarasademtsü adenshia aliba noksa nung angur.

**Seoul, Monupii/May 27**

**(Agencies):** South Korea Catholic lanurtem timba sür nisung 100 shi World Youth Day (WYD) atema renemshiba nung shilem ka ama North Korea den arütsüa aliba tesemi oa yimjung, jungtepa alitsü aser libajen wazüka ayutsü atema sarasadema liasü. WYD ya taruba küm Seoul nung ayongzüksü.

Uijeongbu Diocese nungi World Youth Day ayongzükba committee ajanga May 22-25 sentong ya ayongzük, kong Catholic lanur 80 shi Demilitarized Zone (DMZ) nung adenshi, koba agi Korea ana sadanger. Yangji shilem agirtem ya Seoul nung August 2-8, 2027 anogotem World Youth Day alidang shilem agitsü imlar.

Parnoki arütsülen kilometer 60 shi sarasadema jaja aser Paju aser Yeoncheon County

nung seminar balala nung dena liasü.

Lanurtemi ecological parks aser puti otsü aliba tesemtem semdang aser committee-i ayongzükba lectures aser concerts nunga aden.

Anogo tatemi parnok telok tilala lemsar osangtajung ken tena sarasadem aser parnoki ajangshiba lemsatepa liasü. Iba mapang parnok nem Sacrament of Confession agütsü.

Sentong tembanga May 25 nü Uijeongbu indang Bishop Benedictus Son Hee-song-i anir Holy Mass agia liasü.

Iba sentong ayonger temi ashiba agi, World Youth Day asoshi arogopuri renemshiba nung shilem ka ama sadanger aliba Korean Peninsula jungtepa alitsü aser arütsülen libajen wazüka ayutsü osang lemsateptsü nükjidong nung iba sentong ya ayongzük.

Diocesan organizing committee mendenpuba Father Francis Kim Seung-yeon-i ashiba agi, DMZ ya "values of peace and ecology" meyokteper aliba tesem ka lir.

"Taruba küm arogo mungdang nung alima tesem balala nungi lanur temeshi ainlen jajartem yangi Korea linük ana arütsü nung adenshir parnok yimsü indang jembitsü aser libajen aser yimjung asoshi parnok mulungjang lungjemtsü," ta Kim-i May 22 nü Mass tenzükdang ashi.

World Youth Day mezüing phase dang "Days in the Dioceses" ta ajar aser iba ya July 29 nungi August 2, 2027 mapang alitsü, aser iba sentong ya South Korea nung dioceses 15 nung ayongzüksü aser iba sülen sentong tuluba Seoul nung tenzüksü.

(Maneni tapak 8 nung...)

AO OSHI ANGAZÜKDAK:

TANÜ ANGAZÜKTSÜBA OJANG



Yima

(v) ita mangu aküm (no moon)

\* Yima mapang metsüjangnutsü yokba ajunger.

Yimbang

(n) yimtak tekalenba mepu (upper sector in a village)

\* Ozü yimtak yimbang aser yimlang mepu ana dang lir.

OLONG PAITEP # 7517

Grid for OLONG PAITEP # 7517 with numbers 1-16 in various cells.

TIPLÉN

- 1. Anenzükdak ki - (5)
3. Asür mangyimba - (5)
5. Temulung nung shisadang - (5)
8. T \_\_\_ lu - (3)
10. Takdang temalen - (9)
11. Tesa \_\_\_ a - (3)
13. Ajungbena temulungjang tongtonglatsü atu - (5)
15. Tejen lai nung tesayur - (5)
16. Tsüngsak-mopung - (5)

LANGTSÜNGLEN

- 1. Reprangdaksü - (4)
2. \_\_\_ ur - (3)
4. Kiojen yangludak - (6)
6. \_\_\_ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemtdak - (6)
12. \_\_\_ adenshi - (4)
14. Tsünüsenbongsü adokdak - (3)

OLONG PAITEP # 7516 TELANGZÜBA

TIPLÉN :

- 1. Aben, 4. Artsü, 7. Lisem, 8. Liwa, 9. Sarasadem, 12. Aket, 14. Mangu, 15. Anünü, 16. Ango.

LANGTSÜNGLEN :

- 1. Aruli, 3. Balala, 5. Suwar, 6. Belem, 9. Süjak, 10. Aonung, 11. Dokan, 13. Tinu.

NAI-A YA METETTER



University of Cambridge nung azünger James Goh-i 'fidget spinner' indang alima otsü tasen ka yangluogo. Goh ya engineering student ka lir aser pai design asüba fidget spinner ka minute 30 ser second 34.54 longdakja alima otsü tasen yanglu.

Fidget spinners ta asüba ya teka külen agi amer alongba kazüzü ka lir. Fidget spinners ya stress mesüra nervous energy ajema kümdaktsütsü atema kanga bulua amshir.

Arishi küm 23 tain James Goh-i Cambridge Engineering degree angutsü atema Manufacturing Engineering Tripos azünger aser Guinness World Record ka yanglutsü tebilemba lir.

President Murmu-i Hally War nem Padma Shri agütsüogo



Shillong, May 27, 2026 (Agencies): President Droupadi Murmu-i May 25, 2026 nü Meghalaya conservationist Hally War nem Padma Shri agütsüogo.

Hally War-i küm aika Meghalaya nung root bridges anepalua aruba ajiteta iba naroküm agütsüogo.

"President-i Hally War nem Padma Shri agütsüba atema kanga pelar" ta Meghalaya Chief Minister Conrad K Sangma-i ashi.

Siej village semdangdang Bah Hally-i lipoküm kanga junga metetba, ola madoki bendanga agüja inyakba aser akhümtsübuba angudang kanga

ajungmesoa liasü ta Conrad Sangma-i ashi.

Hally War ya East Khasi Hills kübok Siej nunger lir aser pai taküm piyong rubber fig trees indang tera anepalua arur.

Iba root bridges dang Jingkieng Jri ta ajar aser pai küm aika tera anepalua arur.

"Mezüngbo onok tanurtem atema tera timleni indaktsütsüba ya game ka ama liasü. Ajisüaka tain akümdang item aputem ya teyari agütsüba dang masü saka onok shilem lir ta angatet" ta War-i ashi.

Kümtem süia arudang War-i Siej village aser temeket nung root bridges aika anepalua arur aser lanurtem dang lipoküm

küzmüka ayutsü tesayuba agütsür.

"Item apu ya küm aika nung ang tashi itta akümer. Asenoki anepalu mesüi toktsüra concrete agi melentsü makokba ka samadaktsütsü" ta pai ashi.

"Linük yangerba ya asen senmang wazüka ayuba, alima küzmüka ayuba aser sobaliba sayuba nung amendaka lir" ta CM Conrad-isa metetdaksü.

Meghalaya nung living root bridges ya küm ishika tejakdang ka nungi alimai meteta aküm. India-i UNESCO dang 2026-27 evaluation cycle nung World Heritage inscription atema Jingkieng Jri cultural landscape agüja lir.

AASU-i Tinsukia nung totzü jenjang atuba anema lungkak ait

Doomdooma, May 27, 2026 (Agencies): All Assam Students' Union (AASU)-i Tinsukia district nung totzü aser kechisarena nung jenjang atuba anema lungkak aitba sentong tuluba agiogo.

AASU züngsem noklang aika Doomdooma nung adenshi aser sorkar anema yimyim ayima lungkak ait.

Parnoki sorkar dang jenjang atuba azüoktsü aser petrol, diesel o essential commodities jenjang ajemtsü takhangba agütsü.

Totzü jenjang, mozü aser anogoshi nüngdakbatem nung jenjang atuba ajanga nübortem timtemer aser kibongtemi senotsü aika endoker ta lungkak aitertemi ashi.

Totzü jenjang ajemba aser

inflation azüokba ya public taginüba atema rongdak nüngdak ta agizüka inyaktsüla ta AASU-i ashi.

Totzü jenjang atuba ajanga transportation aser freight costs teimba kümogogo aser meyiper aonsotsü, groceries, mamatzü, mozü aser tanga consumer goods jenjang tuogo ta AASU-isa metetdaksüogo.

Exercise PRAGATI 2026 nung K9 warriors-i specialised skills sayu



Shillong, May 26, 2026 (Agencies): Exercise PRAGATI 2026 nung Indian Army ajanga battle-trained military dogs nüngtugu kümogogo.

Multinational military drill alidang canine units ajanga explosive detection, tracking operations aser combat intervention exercises indang specialised skills sayua liasü ta

Army ketdangsürtemi ashi.

Iba mapang Alan ta ser Belgian Malinois, Victor ta ser Rampur Hound aser Deo ta ser Labrador azütem ajanga shilem agi.

Alan ya assault operations, Victor ya tracker aser Deo ya explosive detection atema training agiba azütem lir. Item azü shiai Indian Army indang K9 teams discipline, versatility

aser combat readiness sayuogo ta ketdangsürtemi ashi.

Iba exercise nungsa robotic dogs amshia liasü aser iba ajanga Indian Army-i advanced technology sendaktepa sayuogo.

Exercise PRAGATI 2026 ajanga linük 12 nungi sepia 400 shi joint tactical drills aser training exercises atema ajurutepa shilem agiogo.



Beirut, May 27: Israel-i Tyre, Lebanon nung tayimtsü amshia amakdang raksatsür aliba ki ka nung nisung nokdaka aliba noksa nung angur. Mongulbarnü Israel-i Lebanon southern aser eastern tsütsü amakdang nisung 18 asü aser 20 dak yema yiru, ta Lebanon ketdangsür temi ashi.

## COSCO products tanker ka Strait of Hormuz ajanger

**Athens, Monupii/May 27 (Agencies):** China nunger shipping group COSCO-i amshiba oil products tanker ka Bodhbarnü Strait of Hormuz ajanga aoba apang lir, ta shipping data ajanga ashir. Iba tesem nung totzü abenba rong tem kanga ajema liaka anogo ka tejakdang totzü tazü abenba rong ana iba tesem ajanga aoba sülen tang COSCO meyong rong ka ya ajanga aor. Iran nung February 28 nü rara metenzükdang Strait ya ajanga anogoshi rong 125 nungi 140 tsüngta senzüa liasü. Rara mechi rong nung senzür nisung 20,000 shi rong noklang aika nung mener Gulf telung nungi madokteti lir. China nunger nisan songa aliba Hua Lin Wan rong nungya

totzü agi yangluba osettem bener Bodhbarnü Strait ajanga mapang liasü, ta data analytics specialists SynMax ajanga satellite analysis nung ashir. Ano COSCO indang crude oil tankers ana iba strait ajanga May 13 sülen ogo, ta ship tracking data ajanga ashir. Tang iba tesem ajanga anogoshi rong 11 shi senzür, koba February 28 sülen kasa lir, ta ship broker Clarksons ajanga asadangteta lir. Greece aser Singapore nung aliba company temi amshiba crude tankers ana Mongulbarnü strait ajangogo, ta Kper aser LSEG shipping data nung sayur. "Strait ajanga tankers senzüba tera timba liaka, rara metenzükdang senzüba den

medemdangra, totzü aser totzü agi yangluba osettem kanga ajema lir, aser Iran aser US nati iba tesem amokbangtsü meranger," ta tanker broker Gibson ajanga ashi. "Rara metenzükdang ama rong senzütsü atema conditions aika abensatsü nüngdaker: security guarantees, mine indokba aser insurance framework tasentem alitsüla." Strait of Hormuz ajanga alima nung totzü shilem 20 shi abener, saka rara tenzüker kanga ajema kumogo. Ano rong toku Strait ajanga Gulf leni ait aser took, ta SynMax aser Kpler ajanga asadangteta lir. Item rong ya container aser oset abenba rong tilaba lir aser chemical yanker ka liasü, ta data ajanga sayur.

## Latvia-i Russia aser Belarus arütsülen anti-drone defences akangshitsü

**Selija, Monupii/May 27 (Agencies):** Latvia-i Russia aser Moscow tembar Belarus den arütsülen anti-drone defences tali kumdaktsütsü, koba NATO linük telungi drones tali aitba mechi lir, ta army ketdangsüri osangbener dang ashi. Ukraine indang drones tem NATO Baltic linüktem indang airspace telungi aitba ajanga

mangmandaktsür aser Russia den tensa tamajungba akumer. Ukraine-i Russia indang Baltic oil loading ports tem nung tenük yoker amaker, aser Russia-i par drones signal mapa meinyaktet kumdaktsüba ajanga lenmang alema ao ta ashir. Iba ama drones ana Latvia nung totzü bendena ayuba facility tazüng ka nung May 7

nü apok. Ano Honibarnüa Latvia telungi drone ka meputeti aita awatsüng ka nung apok, ta angopuer kati ashi. May 20 nü drone ka aruba ajanga Lithuania yimtiba Vilnius nung ozüng yanglurtem ali telung nung atsük aser May 19 nü NATO military jet kati drone ka Estonia anünglen nungi khazüka yok. (Maneni tapak 8 nung...)



Kinshasa, May 27: DR Congo nung Ituri province kübok Mongbwalu tesem nung medical workers tem protective suits agir mapai aotsü renemdang tangokba noksa nung angur. DR Congo nung Ebola wara pokteter mapang talangka masü, saka iba wara agi menepba aser asüba maneni tali akumer, ta Health Minister Roger Kamba-i Mongulbarnü ashi. Health ketdangsür temi suspected cases 1,000 shi jangjateta lir, kong nisung 101 dak iba wara jangjatetogo, ta Kamba-i osangbener dang ashi.

## Hamas armed wing tekolakba tepsetogo: Israel

**Jerusalem, Monupii/May 27 (Agencies):** Israel-i Bodhbarnü ashiba agi, parnoki tawa shimba Hamas armed wing tekolakba Gaza nung tepsetogo. Anogo ishika tejakdang parnoki armed wing tekolakba tepseta liasü. Israeli military-i ashiba agi, Mohammad Odeh ya Mongolbarnü Gaza nung meita aoba sentong ka ayongzüka agiba mapang tepsetogo.

Odeh'er kinunger kati pa asüba Reuters nem jangjashitsüogo, aser pa den asüpila sentong Gaza yimti nung anüngdang sarasadem tembangba sülen agitsü, ta shisem. Ken o dak sendakba nung Hamas-i tang tashi officially osang kecha agüja mali, saka par kinungertemi ashiba agi, pa den kinungsü aser jabaso tepsetogo.

Gaza health ketdangsürtemi ashiba agi, Gaza City kübok Rimal kiyong nung nisung aliba ki ka temaba takdang Israel-i amakba sülen tetsür ka densema nisung trok tepsetogo aser nisung 20 dak tema yirutsüogo. Teküzükertemiba tesem nung maneni inyakdar aser ano nisung timba asüba osang angazüktsü akok, ta osang ajangasa metetdaktsü.

Israel Ato Kilonser Benjamin Netanyahu-i Mongolbarnü ashiba agi, 2023 küm October 7 nü arrtsü adener Israel amakba mapang Odeh ya Hamas indang intelligence division tekolakba liasü, aser hopta ka tejakdang Izz al-Din al-Haddad tepsetba sülen pa melena Odeh ya iba telok armed commander asütsü shim. Haddad ya Israel-i May 15 nü tepseta liasü.

Hamas den sendaktepa aliba source temi military tekolak mapa abentsü atema Odeh shimbabo osang magütsü, saka pai ya Haddad melentsü ta bo imla liasü aser pa ya armed wing lenirtem rongnung tatembangbuba asütsü ta bilemer, ta ashi.

Iba tesem makmak tsüngda Israel-i Lebanon nung ground operation atsülanga aoba indang sangdonga liasü. US-Israel nati February ita tatemlen nungi Iran amak tenzüka sülen Israel aser Hezbollah na rara tenzüksia liasü.

Israel aser Hamas na ceasefire tanabuba shilem benoktsü atema sensaksem bangdaker lir, kong iba telok disarmament aser Israel military atsüngintsüba densema lir.

## North Korea-i AI-guided missile aser artillery rocket tem tendang

**Seoul, Monupii/May 27 (Agencies):** North Korea-i linük lenir Kim Jong Un-i achayanga ballistic missiles, artillery rockets aser AI-guided precision cruise missile tem tendangogo, ta KCNA state news agency-i Bodhbarnü metetdaktsü.

Long-range ballistic missile aser nuclear khaloktsütetsüsa missile tem tajungba yanglua North Korea-i tanem tanemi tactical aser conventional arsenal tajungba küma yanglushia arudar aser item ya South Korea den arrtsü anasa toktsütsü ta tenanzükba agütsüogo.

Tactical ballistic missile tem tashi tendangtsü, long-range multiple-launch artillery rocket tem dak tamang akatsü maktsü aser AI-guided tactical cruise missile temi target tem nung koda mezünga kashir aji tendangtsü atema iba tetendangba ya agiogo, ta KCNA-i ashi.

Kim-i ashiba agi, iba tetendangba ajanga hadir aser automated launch system tem takok ngua yanglushiba sayur.

Iba tetendangba ajanga cruise missile tem rara nung amshitsü atema renema aliba jangjaogo, koba South Korea

den arrtsü anasa artillery unit nung toktsütsü. Missile tem nung precision navigation aser AI-guided control enokja lir aser item yagi km 100 tashi nung target tem dak khaloktsütetsü, ta Kim-i ashi.

South Korea yimtiba kong nütsüngyongsük aika lir iba yimti ya North den Demilitarized Zone nungi km 100 tsüngda lir. North-i South ya parnok tsükchir tulutiba aser longjemtsü atema kecha jenjang magütsü ta tenanzükba agütsüogo.

Cruise missile indang terminal guidance system indang osang agütsüba ya North Korea-i tang mezüngbuba yimjak nung missile nung AI enoksema yangluba metetdaktsüba lir, koba ajanga real-time data amshia target ka map süa lock asür.

North Korea-i 2023 küm tatemlen nungi Russia nem ballistic missile aser artillery rocket tem agüja arudar, koba Moscow-i Ukraine indang rara nung amshidar.

South Korea indang military-i Mongolbarnü ballistic missile ka densema missile balala khatokba jangjaogo, ta ashi.

# Zone-2 Inter School Pre-Subroto Cup tenzükogo



Inter School Pre-Subroto Cup nung mezüngbuba asaya nung asayaba team aser ketdangsürtem tangokba noksa nung angur.

**Dimapur, Monupii/May 27 (TYO):** U-17 tebur aser tetsür atema Zone-2 Inter School Pre-Subroto Cup International Football Tournament May 27 nü Chümoukedima Football Stadium nung tenzükogo.

Iba asayamung ya Department of Youth Resources & Sports aser Chümoukedima District Football Association (CDFA) na longjemer ayongzükba asayadar.

Asayamung lapokba sentong ya Chümoukedima District Football Association tir Sedevikho T Angami lenisüba nung agi aser Sports Coach Khriezotunuo Theünuo-i sarasademer tenzükba liasü.

District Youth Resources & Sports Officer, Chümoukedima, Wutsutho-i lokti pela agizükba o jembiba mapang pai, asayamung ya lanur football asayartem nem parnok sempet sayatsü, sportsmanship angazükdaksütsü, libaliro tajung bentshüsü ajungmesotsü aser kaketshirtem yongtsü nung

telongjem adokdaksütsü nükjidong nung ayongzükogo, ta ashi.

Paisa asayartem dang bendanga agüja, nendak nendaka aser kati ka akümtsübutepa tokteptsü ajungshiba den, Department of Youth Resources & Sports aser Chümoukedima District Football Association na dang iba asayamung takok ngua ayongzükba atema pelaba lemsatep. Maneni pai iba asayamung ajanga lanur asayar tajungtem jangjatsü imlaba lemsatep, shirnok Kohima nung state-level asayamung nung Zone-2 tenüng nungi asayatsü.

Iba sentong nung SDO (C) Chümoukedima, Shreyansee Jain, IAS alakteta jaoker liasü aser lai iba asayamung officially tenzüksü. Lai asayartem dang asayamung tepeyong yimyayimpong azüoka sayutsü aser team ka ama longjemer asayatsü ajungshi.

Laisa, lanur asayartem dang

asayaba moapu nung takokba tashi tajungtiba asayatsü merangtsü mepshiba den, iba amala asayamung ajanga sempet akar tem anitetsü, peisasa dak temulung lemteta kümdaksütsü aser district balala nungi kaketshirtem yongtsü nung telongjem adokdaksütsü atema sabang tajung ka agütsür, ta ashi. Jain-isa asayamung nung team ajaki takok ngua asayatetsü imlaja ataba lemsatep.

Ajak senteper Dimapur, Niuland, Peren aser Chümoukedima district nungi U-17 Boys category nung school 17 aser U-17 Girls category nung school 4-i shilem agidar.

U-17 tetsür aser tebur category nungi final tonga asayaba school tem State Level Inter School Pre-Subroto Cup Tournament nung Zone-2 tenüng nungi asayatsü. Iba asayamung ya June ita IG Stadium, Kohima nung asayatsü.

# Nüngtugu goal keeper Kasper Schmeichel asaya nungi anisüngzük

**Monupii/May 27, 2026 (Agencies):** Taküm küm tetenzüklen tapu kanga mejungi yiruba taneptsü mongutetba sülen Kasper Schmeichel-i pa arishi küm 39buba nung professional football asaya nungi anisüngzükba sangdongogo.

Taoba mapang Leicester City goalkeeper yagi Bodhbarnü sangdong ka ajanga pa Celtic den tenangzüktepba yanglur aliba June ita tembangba sülen asaya nungi anisüngzüksü ta metetdaksüogo.

February ita VfB Stuttgart den Europa League asaya ka asayaba mapang Schmeichel tapu yirua liasü. Iba sülen March ita pa surgery agi, saka specialist temi pa temaba jenjung nung asayaba football asaya nungi anentsü ajungshia liasü.

"Ni June ita Celtic den tenangzüktepba yanglur aliba tembangba sülen professional footballer ka ama kü career tembangtsü," ta Schmeichel-i Danish broadcaster TV2 dang ashi.

"Surgeon aika den sensaksem akaba sülen iba telemetba agiogo. Parnok ya kü tapudak sendakba nung specialist tem lir, aser parnoki ni temaba jenjang nung asayatsü joko ojang dang

imlatsüla ta shia liasü. "Iba ya kecha jangrademtsü masü; ni kü career yamaibo metembangnüi liasü, ajisiüaka ajak tatembang ka dangi arur," ta pai ashi.

Denmark nunger goalkeeper ya par putu nung asayar tajungtiba rongnung ka liasü. Manchester City academy nungi anitetba sülen Schmeichel ya Leicester nung club indang legend ka aküm.

Leicester puri 2015-16 Premier League akokba mapang pai kanga tongtibang shilem agi. Iba sülen 2021 kümclub-i FACup akokba nunga Schmeichel-i teyari tulu agüja liasü. Iba sülen pai club tokja liasü.

Pa OGC Nice nunga kanga takok ngua asayaogo aser iba sülen Celtic nung aden, kong pai Scottish league title anaben atonga bena liasü.

International jenjang nung pa Denmark tenüng nungi 120 ben asayaogo aser pa linük puti otsü nung asaya timtiba nung asayaba asayar ka aküm.

Kasper ya nüngtugu goalkeeper Peter Schmeichel'er jabaso lir. Peter lenisüba nung Manchester United puri 1999 küm Champions League akok aser 1992 küm Denmark-i European Championship akokba nung teyari agüja liasü.

# Singapore Open: Prannoy-i Jonatan Christie tsükdaksüogo

**Monupii/May 27, 2026 (Agencies):** Singapore Open 2026 tebur kija asaya nung HS Prannoy-i kanga junga asaya-a asaya ka mekoki aliba nungi meyipa tur fifth seed Jonatan Christie koka Round of 16-i iogo.

Mezüngbuba game nungbo India nunger asayar ya Christie-i amokbanger asaya aser 21-10 agi asaya ayong ayonga koka liasü.

Prannoy-i asaya jung metenzüklet aser unforced error aika mena asaya, saka kasa mapang nung Indonesia nunger asayar yagi rally tem ayong ayonga aziüoka asaya.

Ajisüaka tanabuba game nungbo asaya melechia liasü.

Prannoy-i süngjemshir kanga junga asaya tenzük aser smash tem pa sasak dak temulung lemteta amaba den net nunga tajungba asaya-a liasü. Pai rally tem pace aziüoka asaya aser Christie nem aibelen menadaksütsü atema nongshia asayaba sülen asaya 21-12 agi akok.

Ajisüaka deciding asaya ya asayar anaprongla atema melarabo masü asü.

Prannoy-i decider nunga kanga junga asaya aser Christie nem asaya amokbanger asayatsü atema maangka magütsü. Mapang ka nungbo India nunger asayar ya 8-11 agi tesülen liasü, ajisiüaka pai point asem atonga ngua break tashi nung pa 11-10 agi tejakdang aküm.

Iba sülenbo Prannoy-i pressure nung süaka asaya kanga junga aziüoka liasü.

Christie-i meyipa arur tajungba asayatsü atema kanga meranga asaya, saka Prannoy-i asaya tatemlen rally tem kanga junga aziüoka asayaba den mapang tapet nung attacking shot tem asaya-a liasü.

Tatem nung Prannoy-i decider ya 21-18 agi akok. Tena tsüngda ghonda ka asaya liasü.

Iba asaya ya Prannoy-i 10-21, 21-12, 21-18 agi kokogo.

Iba asaya ya fifth seed Christie-i ayong ayonga akoktsü ta bilema liasü, kechiyong pa asayamung akoktsü imlartem rongnung ka liasü, saka Prannoy-i pa dang nungi tajungba asayateta takok nguogo.

## KHRISTAN OSANG :

Tapak 5 nungi...

### South Korea Catholic lanurtemi arütsü nung yimjung...

Küm asem nung khen ayongzükba Catholic nunger sentong nungya Pope Leo XIV adentsü sentong lir, koba asür Pope John Paul II ajanga ajungmesoa tenzükja liasü.

Taruba küm iba sentong aliba mapang alima tesem balala nungi Catholic lanur temi Korea lemsar aliba aser jungtepa alitsü asoshi tanen makai inyakba indang angazüksü imlar, ta iba sentong nung Seoul nungi shilem agir Joseph Lee Kiwoong-i ashi.

1392 nungi 1910 tashi

Korea nung yimsü süa aruba Joseon Dynasty laoba sülen 20th century tetenzüklen Japan-i Korea ya amokbanger yimsü asü.

1945 küm World War II tembanga Japan-i Allied forces matsüngdang bendanga agütsüba sülen Korean Peninsula ya North aser South Korea kuma sadang.

South Korea ya United States den tesendaktep tajung lir, aser Soviet Union-i yariba communist yimli kati North amokbang. Linük ana ya tanaben lungjemdaksütsü

merang, saka Washington aser Moscow tsüngta mangatettep aliba mechi takok monguteti rara ang tenzük.

North Korean sepaitemi 1950 küm South maka Korean War tenzük. Iba rara nung nisung million pezü shi tepset aser nisung million 10 shi pei talidak ki yutsür tesem balala nung jenshia lia UN-i aniba sepaitem arua North Korean mitkartem meyipa yok.

Rara tembanga yimjung tezüngzüktep masü armistice agreement ka July 27, 1953 nung zülutepa liasü.

## BENDANGLI OSANG :

Tapak 7 nungi...

### Latvia-i Russia aser Belarus arütsülen anti-drone...

"Onoki taruba hopta ana tsüngta (drone) interceptor teams yoktsü sentong lir," ta Latvian Army Autonomous Systems Competence Centre tekolakba Modris Kairiss-i osangbener dang Latvia nung Drone Summit mungdang ka alidang ashi.

Team tem nungya sepai pezü tashi 'rugged terrain vehicle operating killer drones' nung alitsü, koba ajanga kilometer 10 telungzük nung military drones arua aliba raksatsütetsü, ta pai ashi.

Russia aser par tembar Belarus den Latvian arütsü kilometer 400 talang nung iba ama team tem kwi senzütsü, ajibo mashir.

Yimjung mapang military drones khazüka yoktsü ya kanga tebenja, kechiaser NATO linüktem nung radar data ya miim mapa lir aser ibaji drones raksatsütsü mapa nunglokja aliba sepaitem den lemsateptsü tasak, ta Kairiss-i ashi.

Ano Latvian mitkar aser NATO asoshi tebilemtsü tasen

kaji, drones tila tali amshiba ya lir, ta pai ashi.

Ukraine-i Russia dang timba drones yanglutsü meranger, aser linük ana yagi küm shia drones unit million aika yanglir, ta NATO indang deputy air commander ama inyaker British officer Air Marshal Johnny Stringer-i iba sentong nung ashi.

NATO-i tangbo yamaji meyanglutetsü, saka agiba ama kasa jenjang nung yanglutetsüsa industry nungdaker, ta pai ashi.

## BILEMDANGANG

"Taküm jenjang yanglutsü atema tasü aitsü nungdaker."